

當陽縣志

第貳冊





當陽縣志卷二

方輿志下

山川

國主山川邑亦宜然資險阻阜財用清淑之氣於是萃焉歷代建置往往以山川得名各崇其在封內者而已當邑雖莫爾而水環沮漳平分楚望玉泉紫蓋領袖羣峰雲秀所鍾非偶然矣豈徒登高臨流藉為名勝哉志山水

山

當陽縣志

卷三方輿 山川

一

玉陽山在縣署西北又名仲宣臺縣治主山也自青谿山入境分為二支西支為玉泉為紫蓋東支之盡則為玉陽左襟沮水右帶玉泉羣峰環繞煙樹萬家誠一邑之偉觀

鳳凰山在治西四里玉陽山之來脈也兩翼舒張其形如鳳故名亦名金鳳山

五鳳堆在治南傳漢時五鳳八龍見此故名去堆三里許即龍鳳川亦名八龍潭五鳳洲見述異記

玉泉山在治西三十里初名覆舟山高九百丈上時



有異氣非煙非霧亦名堆藍山下爲玉泉寺隋智者道場寺旁有智者洞北有顯烈山顯烈祠在焉東爲石鐘峽下有乳窟水邊茗草蘿生葉如碧玉名僊掌茶見李白詩序古稱棲霞靈巖玉泉國清爲天下四絕袁中道云玉泉尊特紫蓋寬博青溪秀媚玉泉堂奧也紫蓋門戶也青溪園囿也遊者以漸而入彌深彌妍可謂得遊山三昧矣

紫蓋山在治南五十里頂方而四垂若繖蓋狀林石皆紺色故名道書所謂三十三洞天也山半有紫

蓋寺後有孝先閣碧霞洞煉丹井下有綵水甘馨異常舊傳葛鉉煉丹於此又爲樊夫人昇仙處登其上江帆在目東南諸山皆可指數誠治南一名勝也荊州記曰山有石金每雲晦輒見金牛出食光照一山卽金之精耳

柴紫山與紫蓋相連五代僧天皇道悟居此有石室甚幽

九子山在治北十里九峰嶽舉紫翠網緼山麓有仙姑洞石磊磊如旋螺傳爲曹何二仙姑棲真處



錦屏山在治北五里沮水繞其西南

狼尾山在治南五十里

龍泉山在治東北十五里重岡疊巘翼抱若城中峯

高聳其下為龍泉寺左為龍泉相傳即遠公卓錫

湧泉處後有遠公洞右為胡文定公墓

武安山在治北倒流橋之西羣峯層折如相拱揖

許由山在治東十里沮水與玉泉會於其前

方山在治東四十里層嵐聳翠最為幽勝宋唐子方

曾讀書於此上有紫金觀讀書臺邑人劉續祖有

當陽縣志

卷三

方輿

山川

三

方山八景詩

石爐一元至正年造  
石塔一明正統年建

廣福山在治東清溪所自出

萬壽山在方山南八里上有廟明時建

香爐山在治東四十里有石爐一碣一鐫有元至正

壬申仲秋月數字

玉明山在治東十四里前環漳水後擁諸峰順治十

八年里人創修殿宇名雙峰院

三星山在治東六十里唐僧一行道場有三井在寺

左右乃一行鑿以穰三星者有塔高一丈五尺又



傳司馬子微曾修真於此

圓臺山在治東六十里

雲臺山去圓臺里許上有燦霞觀石塔巋然傳為唐

玉真公主建撰文者陳宗遜書碑者庾遠也東有

赤土坡鴻門塚仙女山金雞塚東南有雙塚鳳凰

諸山

鎮頭山在治南七十里西瀨沮漳上有梳妝池四時

不涸前邑令李一陽曾濬之東北有德勝山

朝陽山一在麥城隄首上有古觀沮漳夾繞人煙繡

當陽縣志

卷之三

方輿

山川

四

錯亦擅一方幽勝一在縣西五十里上有朝陽觀

秣馬山近萬城相傳關帝督荊州時秣馬處其下有

軍器窖犯之即雷電作云

鐵山在治西北分脈青谿

綠林山在治東北百二十里漢王常馬武起兵處西

魏時曾以此名縣

按古綠林縣城在今荆門沙洋地距綠林山百餘里因山在境

內故以各縣

明月山在治南四十里

青谿山在治西北三十里為邑西障本名青山有泉



曰青谿故云山發自房陵之景山東支爲荆山西支爲青溪諸山酈道元云尋源浮谿最爲深峭述異記云青谿秀壁諸山洞多乳窟盛宏之云稠木旁生凌空交合危樓傾岳恆有落勢風泉傳響於青林之下巖猿流聲於白雲之上泉側多結精舍郭璞遊仙詩云青谿千餘仞中有一道士殆指此耶溪水曲折里許東注於沮屬當境者三之一山上寺觀則今屬遠安云

妙峯山在治東北五十里

當陽縣志

卷之三

方輿

山川

五

雲夢山與青谿山連上有三石高丈餘方廣如之名曰鐘鼓石其上可容數坐石紋如方罨傳鬼谷子對奕處又傳諸葛屯兵處古徑蒼幽晴嵐縹緲亦勝地也

仙神山在治西六十里羣峰環抱清晨常有異氣揚旗巖在治北四十里詳見砦堡

音寺巖在治西三十里舊有一音寺峰巒層疊爲玉泉中路

梯兜巖在治西十五里卽西屏山石徑險絕雲壑幽



深上有觀音殿文昌閣

佛耳巖在治西十五里壁立沮水之濱巖間有洞躋攀頗艱

七孔巖在治西三十里壁立如削下有七孔故名

聖母洞在聖水寺前歲旱民取水祈雨多應

真武洞在玉陽山麓巖上勒有真武洞天四字

高家洞在治北五十里怪石臨溪洞口豁開行數十步頗平曠可容數百人雲氣嵌空陸離萬狀已復巉石突起絕無徑路捫蘿直上得小竇蛇行乃得

當陽縣志

卷之三方輿山川

不

度復平曠如前漸細爲門忽石笋倒垂距地尺許下有潭窅不可測投以石轟轟有聲仄足避潭抱巖乃得度巖間石乳幻結悉作佛龕藉裊趺坐如塑像洞後有穴達他洞微露曦光過此幽闕寂冷霧氣逼人無敢窮其底者按山半有孔如城門由斜徑上不知爲石穴行數百步隔小峽上爲南臺高十餘丈廣數丈旁山如獅面山如球下山如屏澗水當其右藉以利灌溉云

臥龍洞在治北五十里山頂一窟深不可測探者如



入鼠穴數十步乃得平曠處高廣十餘丈石乳螺結蝙蝠倒棲其上一徑斜通闊數尺深約里許泉自中出清冷可掬按山有洞一甫大甚狹歷丈餘豁然開朗高八九丈廣十餘丈遠數十丈可容數千人

白龍洞在治北六十里卽白龍溪溪水流逕鞏河入沮水洞臨溪澗峭壁峻岫緣巖右行仄徑達山腰洞作三窟高廣可十餘丈石壁玲瓏或作五色石田七畛如阡陌狀清泉外注下瀉於溪深入輒有

當陽縣志

卷之三方輿

山川

七

氣逼人燈炬皆息洞後有穴可通呼應人語其中皆能響答按洞中有數百蝙蝠不得常見外有樟樹十餘株土人結舍其中以避流寇云

百家洞在治西二十里洞懸沮水之澗陡逼無徑由山頂委折乃得入

遠公洞在龍泉西山半巖間晉慧遠趺坐處

楞伽峰在玉泉東七里爲神秀道場唐僧法瑱自玉泉至度門夾道皆植松因名七里松

己公嶺在治西二十里唐僧齊己曾結廬於此因名



九女廂在治北削壁千尺俯臨沮水遙望若張素幕  
山半有洞深廣數丈土人因鑿數十窟以避寇

三牛嶺在治北六十里山脊三石形似臥牛以上續舊志

鐵人谷在治北七十里山谷間有四石甚巨鐵色人  
形故名

將軍山在治北七十里山半屬遠安

藏馬谷在治西十五里近乾溪

巖兀洞在藏馬谷控山帶水古木參差

紫雲山在治東南百餘里傳元無聞和尚誦金剛經

當陽縣志

卷之三方輿 山川

八

有紫雲見故名 以上五山依舊志補人



水

沮水

左傳山海經皆作唯

出鄖陽府房縣

漢為房陵屬漢中

景山

荆山之首

東南流逕遠安縣青谿注之又東逕當陽城玉泉

注之又南逕麥城西楚昭王墓東又南入天津湖

與漳水合

舊志

漳水出自南漳荆山東南流過蓼亭折而西南過古

編縣城

按城當在今石人山之陽荆門西北南漳界上

南至縣北清溪注

之又南過麥城與沮水合入天津湖漢書地理志

注禹貢南條荆山東北漳水所出東至江陵入陽

當陽縣志

卷三

方輿

山川

九

水陽水入沔行六百里

按陽水即楊水在今江陵縣地水經注龍陂水逕郢

城南東北流曰楊水江陵縣志楊水發源於紀山逕龍陂橋入海子湖宋史孟珙傳沮漳舊自江陵

城西大江因障而東之俾繞城北入於漢據此則沮漳入沔當是宋末水道又方輿紀要云孫吳時

引諸湖及沮漳水浸江陵以北地以拒魏兵號為北海則沮漳會楊水自三國時已然顏師古漢書

注之文當本於此今江陵長湖濱有關沮口是其故道也舊志云東南出沙倒

灣右會沮水分二支一支過枝江界會沱水入江

按此一

支過萬城由荊州入江

按古時沮漳入江在江陵

赤岸近世江徙而北遂由筲箕窪入江云

按沮漳二水網絡羣流入邑境而始大然以之



視漢不過十之一其視江則百之一耳廼與江漢並稱楚望母亦逼近郢都王氣所鍾楚之富強肇基於此周頌漆沮洛卜漚澗殆此類與

滄水在治東南接水經註漳水逕麥城南滄水注之山海經曰滄水出東北宜諸之山今合洛東南有數港入漳滄水當在其中惜不能詳

沱水舊志謂水自江出逕縣治東南與沮漳合又經枝江縣境東入於江爾雅水自江出爲沱按今枝江縣境董市江口一帶即沱水也

按沮漳南流過枝江界右分一

### 當陽縣志

#### 卷之三

方輿 山川

十

支出鵝子口即沮漳會沱故道今已淤塞俗名乾河

涓水出治東廣福山西注於漳亦曰白蓮池即白社明李賢涓溪記曰一水縈迴清澈可愛

玉泉在玉泉寺階東有泉湧出俗名金龍池郭璞遊仙詩序稱玉泉潛行九萬八千里通天竺注震旦指此玉泉流至山門外珠泉北來注之折流而東逕已公嶺又東過治南入于沮按玉泉入沮在治東南七里俗名三里港

珠泉在翠寒山下近智者洞每鼓掌即串珠而上東



流與玉泉合

熨斗陂在治東南八十里按郡志綠林山水流逕圓臺山南匯爲熨斗陂唐李端赴蜀詩云琵琶寺裏響空廊熨斗陂前野成荒指此宋末郡守吳獵嘗遏走馬湖熨斗陂西北至李公匱以限戎馬今麥城東南十餘里有走馬隄

金沙灘在治南一百二十里流沙如金沱江之灘也山海經曰沮漳之淵有神鼉其狀人面羊角虎爪出入有異光殆謂此也今治南十餘里亦有金沙

當陽縣志

卷之三

方輿

山川

十一

灘沮水之灘也未知孰是

昭溪港在治北六十里近三牛嶺一水迴環仍與漳合傳楚昭王返國經此

金龍潭卽遠公洞在治北十五里龍泉山下傳宋徽宗時建明堂遣吏取水於潭投金龍鎮之故名

紅泉爲金龍潭旁流

淬劍池寰宇記云在當陽治北傳歐冶子淬劍處近

昭溪港

補遺



柘林灘在治東南六十五里

天津湖在治東南沮漳合流匯而爲湖今沙倒滋泥  
等總地

插桅溝在治北一百里漳水之西

石龍灘在插桅溝上石砍橫互水中高可丈餘方冬  
水淺聲如瀑布舟人由石罅架木爲梁拽舟乃得  
上爲漳水第一險處

胥寓港在治東南麥城廢城之間一名子胥港

若竹溪在治北二十里

當陽縣志

卷三

方輿

山川

三



古蹟

邑無論大小莫不有古人遺跡以寄託於山川形勝之間景仰前徽感慨係之矣當陽本漢縣歷代沿革往往名隨地遷舊志所載權國綠林故城皆今荆門地茲闕而不載載其在境內者疆界有定制不敢附會也志古蹟

東城在治東一百四十里今荆門州治東即古當陽縣城見水經注五代高氏曾移荆門軍於古城元至元間亦移荆門府於古城皆指此今荆門地

當陽縣志

卷之三 方輿

古蹟

三

麥城在治東南五十里沮漳二水之間傳楚昭王所築三國時關侯為孫權所襲西保麥城即此

驢城在治東南五十里亦夾沮漳二水

磨城與驢城對隔沮水二城傳伍員築以攻麥城者諺云東驢西磨麥城自破

糜城在治東南六十里地名八渠傳蜀將糜芳守江陵時築

荆臺縣故城在治東六十里稱荆臺鄉今荆門交界處



萬城在治東南一百二十里本名方城傳是五代高

氏所築

方輿紀要方城或云孫吳所築

宋末荆湖制賓使趙方曾

繕此城子蔡復鎮荆湖避父諱改為方後改為萬

舊有六門東曰紀山嵐秀西曰江州雲物南曰海

湖煙月北曰平埜風林十字街前曰總門曰石關

門明初曾徙縣治於此又有三江六渡口皆沒於

河

舊志一作唐郭子儀修未知何據

仲宣樓本在玉陽山頂舊志謂即城南樓一樓也而

荆襄互爭借為名勝考荆州仲宣樓乃五代高季

### 當陽縣志

#### 卷之三方輿

古蹟

十四

興建本名玉沙樓又名望江樓宋陳堯洛始改此

名襄陽距沮漳尚遠則樓在本邑無疑惟賦內沮

漳並舉不應在今縣治古麥城在沮漳之間庶幾

近之舊志無所考

長坂在城西一里詳事紀

道旁有碑刻有長坂雄風四字為當陽八景之一

橫矛處在治東北五里名官橋乾隆二十四年邑令

苗肇岱重修立石

壽亭侯印宋紹興間洞庭漁人獲送寺中清熙四年

僧真慈將獻東宮夜發光怪乃止宋司馬知白有



記

按漢壽地名亭侯爵名印文當曰漢壽亭侯宋司馬知白記止曰壽亭侯印未知何據附記

別部司馬印

關某司馬印皆三連環紐玉泉舊志

云此二印至元世尚存又胡琦傳云別部司馬印方一寸其一印方一寸五分兩環相連系於紐文半譌惟司馬二字可辨今失

智者洞爲智者靜修處袁申道云石理甚堅中若夏屋洞下有井與大江爲盛衰

幻霞洞在堆藍山石紋如霞故名洞前有柴紫菴詳寺觀

當陽縣志

卷之三

方輿

古蹟

五

寒亭在智者洞左菩提菴古木蕭森下有溪流景色幽絕宋人詩話云玉泉山寒亭過客多題詠一名翠寒

白蓮池在清溪寺右晉遠公至此掬水浴白蓮生水  
面因名又名白蓮社

丹井在紫蓋山葛仙翁鉉煉丹處今僅智井耳  
鐵鑊在玉泉寺內隋大業十一年造

張燕公碑在度門寺唐張說撰文盧藏用書

唐賢詩碣宋慶歷間荆門軍守曲臺謝公錄唐人玉



泉詩八篇刊石康熙四年邑紳楊州彥梁山金粟引之重建碑亭

曹將軍港按讀史方輿紀要權水出西蒙諸山北流

太子岡會流為曹將軍港唐曹全最劉巨容敗黃

巢於此因名

按當在今荆門北境

文定書院

詳古蹟胡文定墓

北山書院在沮水北宋朱震朱巽兄弟讀書處

讀書臺在治東四十里方山上宋唐介讀書處

時習館宋侯仲良讀書處舊文昌閣地

當陽縣志

卷三

方輿古蹟

六

太子岡在治北元文宗為太子時駐蹕所也百官進

食皆不受惟啜一茶克學詩云玉輅金根駐此岡

一卮鳳髓進霞觴豈知四十餘年後老樹殘蟬送

夕陽

按岡在荆門北境今鍾祥界上

梳妝樓在玉泉寺宋明肅皇后自蜀入都會過此及

貴因建此樓黎巽詩畫樓不可見寥落秋草荒鏡

作空山月無人更理妝

龍眉龍角宋明肅皇后賜以鎮山者今失

鐵塔在玉泉寺山門外



鐵釜在玉泉寺內釜有三各重三千斤一爲元至正五年造一爲十一年造

鐵鐘在玉泉寺內鐘有二一爲元至大元年造一爲延祐七年造今存又雲板一宋元祐七年造今失

三公臺在城西南明萬歷時中丞趙賢守藩王琬巡臬鄧林喬三公問俗登此

三家市在治東南六十五里柘林灘上相傳舊有小市久廢舊志謂即古三戶津地

蓮花坪在治西五十里鄭家坡下相傳陸地生蓮今

當陽縣志

卷三

方輿

古蹟

十七

大蓮小蓮二總名本此

八景附

紫蓋晨鐘 龍泉夜月 堆藍晚翠 長坂雄風

鵲岸漁歌 錦山牧笛 玉橋秋雨 金嶺朝煙



陵墓附

關聖陵在治西五里今章鄉總地背西面東門臨沮水  
四望平曠水外山環亦形勝也陵為土阜高二丈  
甃石為垣加扶欄其上周二十餘丈墓門有碑書  
漢時官爵覆以亭亭前數武即寢殿也考之吳歷  
孫權以諸侯禮葬之此邦之人相沿墓祭歲以為  
常宋開寶中詔置守塚三戶淳熙中襄陽太守王  
銖始建祭亭環以垣牆樹之松柏元至元中玉泉  
山僧慧珍翦其荆榛封其邱壟作祠門以表之明

當陽縣志

卷之三

方輿

陵墓

一六

成化三年勅修武安王墓邑令黃恕請立廟春秋  
祀之見關陵紀畧此廟祀之始餘詳祀典

楚三王墓在湮沈湖之濱今兩河口柏木港花栗園  
諸處往往有華表出地尺餘明崇禎元年耕夫偶  
啟一壙見墓門扇閉亟掩之大抵地近荆郢歷代  
多貴戚家不必皆楚王墓相傳近紫蓋山有五代  
高氏暗塚七舊志

楚昭王墓在治南八十里舊志

按王粲登樓賦曰西接昭邱昭邱當在麥城西距



縣治不過五六十里今治南七十里即枝江界

荆王墓在黃泥岡岡上舊有楚莊王廟按漢唐宋封

荆王者三漢荆王賈在淮東宋荆王元儼未嘗之

國惟唐荆王元景高祖莫嬪子貞觀十年徙封荆

尋為荆州都督有惠政後以罪誅此其墓耶舊志

周將軍墓在治東南五十里麥城之西乾隆二十三

年邑令苗肇岱加修勒石相傳有耕夫掘地見碑刻有周將軍數字其名

號年月不可辨邑令聞之故有此舉

按三國志關侯傳同時遇害者子平及都督趙

當陽縣志

卷之三方輿

陵墓

九

累而無周倉之名今天下廟像列周而遺趙心

竊疑之夫以陳壽帝魏之見於蜀漢諸臣應多

闕畧固不得以周將軍為亡是公若明明都督

趙累載在史冊名位當在周倉之右而反畧之

何也附載於此以備參考

胡光祿墓在治北二十里苦竹溪宋崇甯中胡文定

為蔡京所嫉退居漳濱迎父名淵就養卒葬於此

後贈光祿大夫今湖南衡山縣亦有胡淵墓未知

孰是舊志



胡文定墓在治北十五里龍泉寺右舊志謂墓祠即  
文定故宅後改爲文定書院古松合抱者環墓四  
十三株荆門舊志亦云文定卒葬龍泉山三子寅  
宏甯俱貫荆門乃湖南湘潭亦有胡文定墓省志  
則云甯後徙湖南卒於湘潭豈湖南諸墓乃諸公  
子窆耶舊志

幹廉訪墓在治西十五里有碑云山南江北道肅政  
廉訪使幹公之墓舊志失其名按元時  
改按察使爲此稱

聶州牧墓在治西十五里聶公名炳江夏人元至正

當陽縣志

卷三

方輿

陵墓

二十

間守荆門州甫半載淮漢賊起州城不守炳出募  
土兵復其城未幾賊再至炳晝夜血戰死之葬於  
此土乾隆二十五年知縣苗肇岱率士民加修勒  
石定界置守墓者舊志

樊妃塚在治北二十里按張曲江詩序云郢城西北  
有大古塚數十觀其封域多是楚諸王而年代久  
遠不可復識惟直西有樊妃塚因後人爲植松柏

故行路皆知之舊志

白骨塚在西門外舊志



義塚五一城西一河溶一消溪一魚兜一譚家岡見  
通志

富陽縣志

卷之三方輿

陵墓

三



風俗

列國之詩皆曰風風者何風行四方而國俗之異同於此見也古者侯伯受封其幅員小者不逮今一邑國自有風俗即邑自有風俗矣記曰修其教不易其俗齊其政不易其宜守斯土者睹風俗之醜疵當亦知所從事焉志風俗

圖經云男勤耕耨女重桑麻

隋書云荆俗率敬鬼尤重祠祀屈原爲制九歌由此安陸府志云當陽事簡俗樸勤農尙儉

當陽縣志

卷三

方輿

風俗

三三

正月元旦先期必潔庭宇更桃符書鬱壘於門五鼓出方於各廟焚香沿門賀歲

十五日上元迎紫姑以卜將來蠶桑並占衆事又好爲龍燈竹馬鼈山之戲士民觀燈者絡繹於道累跡駢肩郭門不閉輒達曉

三月清明家家以紙錢麥飯掃墓標墳遊人多擔榼挈壺於東郊西屏間爲踢青之行

五月五日門前懸艾葉飲蒲酒婦女多簪繭虎彩蛛間一解粽而競渡者寥寥焉



七月十五日中元最重家家設庶饘焚祆錢以祭其先已嫁女老幼悉歸甯謂之過月半

八月十五中秋節俗多不拜月猶尚瓜果餽餽交相餽遺

九月九日多賞菊泛萸士夫輩往往於錦山西屏最高處登臨眺覽唱和以詩

十二月二十四日拂塵祀竈謂之過小年爆竹聲紛紛不絕

三十日家家書宜春字具牲醴祀神祭祖闔家聚飲

### 當陽縣志

#### 卷之三方輿風俗

三

爲團年飯宗族間交相辭歲爆竹鼓樂聲喧徹曉以

上續  
舊志

通志論曰江漢被西岐之化筆路開南國之風風氣之醕樸可知也史稱其民喜巫鬼尙淫祀至今猶有存者夫元公倡道二程誕降紫陽南軒宦遊講學非楚地歟趙復入北方而魯齋諸人始聞有道學得其書而讀之躋於鄒魯不難也而綴文者咸沾沾於湖畔莫愁隄邊歌曲豈有當於化民成俗之意也哉



舊志曰當陽士夫樸茂好修蓋猶有周南之遺風  
焉西北多山谷其民質嗇習於勤苦獨東南近江  
陵市井所在稍競聲利大約婚嫁往來均於禮不  
甚遠惟居喪作佛事供賓客鼓吹梵唄之聲不絕  
於耳此其疵也



物產

自禹貢詳三品之金職方重丹銀之利歷代土貢見於史志者間有異同當邑本荆楚地所產皆日用尋常之物不列於土貢可不志志之以備其體亦可見民風之醇樸焉志物產

當邑家業耕穫所植百穀頗饒嘉種稻分秔糯麥別來牟曰棉曰苧曰麻曰豆載之不勝載也水之族若鯉魴鯽鱖鯉鯖蝦蟹螺蚌之屬亦紀之不勝紀也樹之屬松桂栝柏桑柘梓桐槐柳楓榆其種不一菓之

當陽縣志

卷之三

方輿 物產

三五

屬梅杏李桃梨柿棗栗橘柚橙柑其種不一蔬之屬早韭晚菘露葵霜蕪其種不一藥之屬枸杞茱萸菖蒲芍藥葛朮艾蘇半夏牛膝其種不一羽之屬有百舌畫眉蒼鷹錦雉老鸛毛之屬有虎豹鹿麀麕兔豺獺其種不一至於家之所畜鵝鷄羊豕其種不一要皆各邑所同也惟有玉泉仙人掌茶不常見

舊志

舊志論曰嘗讀禹貢而深歎古人用心之醇也籍其所有而民不以爲病故可得而籍也及覽職方物土之宜視禹貢不啻殺焉此即旅獒之志也考



山海經荆山其陰多鐵其陽多赤金而禹貢亦惟  
金三品然則首山之銅卞巖之璞皆不誣也宋人  
得玉而獻之非果忠田父得珠而棄之非果愚懼  
禍也然則方產之志如之何紀其常而已或曰美  
斯傳傳斯志常何紀爲雖然大美不言不言之美  
美矣哉常也者有其美者也美也者失其常者也  
國家貢篚不尙異物各從其土爲可繼焉猶然禹之  
明德也然則方產之不可深論也明矣

補遺

當陽縣志

卷之三方輿物產

三

鵲鴿

邑產見通志

花生

本川種本省所  
產當邑最先



祥異

符瑞之說聖世弗尚矣顧天有風雨之不時地有山川百物之爲妖水毀木饑豈偶然者史家所以志五行也當邑本蕞爾其氛祲災祥不關於通省之休咎然通省所同者非一邑所得私也茲考其在境內者著之於篇於以占豐耗重民生焉志祥異

漢元康四年己未邑獲白虎見丹鳳

晉永嘉三年己巳七月邑地裂三處各廣三丈三尺

當陽縣志

卷之三方輿

祥異

二十七

長百餘步

梁大寶元年庚午甘露降邑境按梁書元帝本紀南平王恪等奉踐湘東王有云甘露泥枝降乎當陽之境

宋淳熙三年丙申夏荆門軍旱冬大饑八年九年十年皆旱按宋時當陽屬荆門軍

紹熙三年壬申荆門軍大雨逾旬水潦爲災

元至大三年庚戌秋七月水

泰定三年丙寅秋八月地震



至順三年壬申秋七月荆門諸屬縣水田廬多漂沒  
至元元年乙亥冬十二月芝草生於覆船山一本五  
幹高尺有二寸一本二幹高五寸有奇幹皆兩歧  
二本相依附瑰奇如珊瑚枝其高者結爲華蓋慶  
雲之狀

明

洪武十三年庚申大水時縣治萬城水齧城西北盡  
陷乃徙復舊治

宏治二年己酉旱四年五年相繼大旱

當陽縣志

卷之三 方輿

祥異

三

嘉靖五年丙戌旱

十一年壬辰夏大水

十八年己亥夏旱

萬歷四十五年丁巳彌月不雨蝗食禾苗殆盡

崇禎二年己巳三年庚午相繼旱虎多噬人

六年癸酉地震玉陽山夜鳴玉陽觀中木魚忽自開

合旋有城陷之難

在甲戌年

十三年庚辰旱飛蝗蔽日民間產牛一身二首二尾  
十六年癸未冬桃李花



國朝

順治四年丁亥虎狼遍山谷噬人甚眾有村落無孑遺者

六年己丑大水

十五年戊辰夏大水西山蛟起水決城外隄數十丈附郭民舍皆漂沒男女溺死者甚眾是月有暴風自南來聲如雷所過拔木廬舍盡傾池塘皆涸

十七年庚子大旱無禾

康熙七年戊午大水

當陽縣志

卷三 方輿

祥異

三九

二十九年庚午旱饑

四十四年乙酉大水

六十一年壬寅旱

雍正元年癸卯大旱

五年丁未春大雨浹旬水潦無麥

十三年乙卯大旱

乾隆十年乙丑夏秋大水

十四年己巳大水

十七年壬申大旱無禾

按通志是年水與此異大抵邑之西北常旱東南常水不



足奇也

二十三年戊寅大有年

三十三年戊子旱

三十六年辛卯水 通志作旱

四十三年戊戌麥大熟夏大旱次年春大饑民食樹

皮殆盡

五十年乙巳大旱無禾

五十一年丙午麥大熟夏大水蟲食禾苗

五十二年丁未大有年斗米百錢

當陽縣志

卷之三方輿 詳異

三

五十七年壬子旱

五十八年癸丑夏大水羅家灣隄決沙倒滋泥等總

淹沒殆盡有莊姓民人舉家數十口同溺死

嘉慶二十一年丙子大水

道光六年丙戌春二月晦有物首如懸帆光赤尾長

丈餘自東而西旋沒夏六月大水東南隄防皆決

居民多溺死者

十一年辛卯十二年壬辰相繼水大饑

十五年乙未旱蝗至十六年冬始止



二十一年辛丑春大雨浹旬饑

二十八年戊申東南水

咸豐五年乙卯冬十一月池塘溪港有水處皆無風  
自動波浪三四尺有頃始定

六年丙辰夏旱

七年丁巳夏旱蝗食禾苗殆盡惟治北黃鵠灘有鷹  
數百啄蝗空中蝗避去不爲禾苗害

同治四年乙丑夏六月大水西北山中五處同日蛟  
起人畜漂沒者甚衆東南湖鄉汜濫尤甚

當陽縣志

卷之三

方輿

祥異

三

五年丙寅春三月大水北山蛟起沮漳上游田產廬  
舍多漂沒舟楫多傾覆人畜溺死者甚衆東南下  
流豆麥被淹夏大水隄防多決東南無秋